



Protocol

dalla seduta dil cussegl da vischnaunca,
venderdis, ils 14 da zercladur 2013, allas 20¹⁵ – 22⁰⁵ uras
en casa communal

Presidi: Flavio Murer

Actuar: Ervin Maissen

Presents:

- | | | |
|-----------------------------|--|--|
| a) Cussegl | Christoph Berger
Armin Berther
Adrian Bigliel
Silvio Candinas
Edgar Durschei
Rita Huonder-Tenner
Wendelin Jacomet
Jordana Lozza-Desax | Armin Manetsch
Flavio Murer
Adrian Pally
Marco Schmed
Alfred Spescha
Rico Tuor
Livio Zanetti |
| b) Suprastonza
communala | Francestg Cajacob
Madlen Deflorin-Spescha | Iso Mazzetta
Roger Tuor |
| c) Perstgisas | geraua Cecilia Maissen-Desax | |
| d) Hosps | 3 personas | |

President dil cussegl da vischnaunca

“Jeu beneventel Vus alla quarta seduta dalla perioda d’uffeci 2013/2016 cheu en casa communla.

Tut ei en moviment. Ils davos dis havein nus astgau endriescher ch’il marketing da nossa destinaziun – Sedrun Mustér Turissem – vegn surdaus a Grischun vacanzas. In pass curaschus denton forsa era necessari per saver seposiziunar egl avegnir da maniera professiunala cun nossas purschidas da nischa.

Naven dad ussa duein ils dus capricorns Gian e Giachen plidar per nossa biala cuntrada e nossas purschidas singularas.

Oz havein nus oravontut da tractar las pendenzas en connex cun la decisiun dil pievel dils 3 da mars 2013. Numnadamein il conclus davart eleger el futur la cumissiun da gestiun entras il pievel.

Cunquei che la Regenza cantunala ha approbau ils 21 da matg 2013 las midadas dalla constituziun communal, havein nus oz l’incarica d’adadattar e surluvrar la lescha davart ils dretgs politics ed il regulativ da fatschentas; il manual dallas autoritads co lur lavur ha da succeder el mintgadi. Silsuenter sa l’elecziun dalla cumissiun da gestiun succeder tenor las prescripziuns revedidas. Gia ussa engraziel grondamein per la preparaziun da quels documents entras ina gruppa da lavur eligida dalla suprastanza communal alla quala anteriur mistral Heinrich Huonder, president communal Francestg Cajacob ed il vicepresidente dil cussegl da vischnaunca Wendelin Jacomet han fatg part.

Ultra da quei selegrein nus d’astgar s’exprimer davart las empremas fatschentas che la suprastanza communal ha preparau per nus.

Dapi la davosa seduta dil cussegl da vischnaunca han ils suandonts vischins bandunau il terrester. Cun in bien patratg lein nus seregurdar da:

Gion Manetsch-Tones da Gonda, naschius ils 3 da matg 1931 e morts ils 20 da matg 2013 e Pius Condrau-Hendry, naschius ils 27 da december 1924 e morts ils 8 da zercladur 2013.

Pius Condrau, burghais d’honor da nossa vischnaunca, ei sefatgs meriteivels en numerus secturs a favur dalla vischnaunca, la regiun ed il cantun. Quei sco cusseglier e president dil cussegl da vischnaunca, sco commember e president dalla cumissiun da gestiun, president dalla Pleiv Sogn Gions, deputau al Cussegl grond, sco promotur ed iniziand dallas Pendicularas Mustér SA e buca il davos sco amitg da nossas muntognas e cau dalla Colonna d’agid. Duront numerus onns ha el menau cun success l’interpresa Condrau SA cun la Gasetta Romontscha ed installau sco ina dalla empremas stamparias en Svizra la pli moderna maschina da stampar en color. Interessaus pil vargau ha el adina mirau en in prospereivel avegnir. Quei ei mo ina part da ses gronds merets, ils quals ein strusch d’enumerar. Jeu sundel perschadius ch’ina ni l’altra da sias visiuns vegn a vegnir realisada ils proxims onns.

Els ruaussien en pasch.

Fetg grond plascher hai jeu da comunicar dapi nossa davosa seduta duas naschientschas, numnadamein:

Jenna Melina Dermon da Davos-Mustér e Laurin Bucheli da Segnas, ad els in cordial beinvegni ed als loschs geniturs nossa cordiala gratulaziun.”

La gliesta da tractandas secloma sco suonda:

1. Protocol nr. 3-2013/2016
2. Lescha davart ils dretgs politics e regulativ da fatschentas:
Revisiun parziala (messadi nr. 2-2013/2016)
3. Center da sport e cultura: Credit supplementar per sanaziuns urgentas
(messadi nr. 3-2013/2016)
4. Canalisaziun Sontget- Carcarola – Ual d’Acletta: Damonda da credit
(messadi nr. 4-2013/2016)
5. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



Cussegl da vischnaunca 04-2013/2016

Seduta dils 14 da zercladur 2013

1. Protocol nr. 3-2013/2016

President dil cussegl da vischnaunca

Il protocol ei vegnius tarmess tier per posiziun. Enteifer ils 5 dis fixai ei vegniu inoltrau neginas objecziuns.

Cussegliera Rita Huonder-Tenner

Ella ei dall'opiniun ch'ei seigi a caschun dalla davosa seduta vegniu communicau sut tractaziun dil rapport da gestiun che quel seigi provisoris e che la cumpletaziun da quel pertuccont la tractaziun da postulats pendants sappi succeder posteriuramein. Ella ha buca anflau quella remarca el rapport da gestiun.

Quell'objecziun ei nudada el protocol nr. 3-2013/2016 dils 26 d'avrel 2013 sin pagina 13.

Decisiun

Il protocol nr. 3-2013/2016 dalla seduta dils 26 d'avrel 2013 vegn approbaus senza midadas.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



2. Lescha davart ils dretgs politics e regulativ da fatschentas: Revisiun parziala (messadi nr. 2-2013/2016)

Suprastonza communal

A basa dil messadi nr. 2-2013/2016 presenta il president communal la fatschenta. Specialmein fa el attents che la Regenza hagi approbau ils 21 da matg 2013 la revisiun parziala dalla constituziun communal, la quala ei sedada sin fundament dall'approbaziun dall'iniziativa dil pievel concernent l'elecziun dalla cumissiun da gestiun. Sin fundament da quei conclus sa il cussegl da vischnaunca reveder la lescha davart ils dretgs politics ed il regulativ da fatschentas, aschia ch'ins sa menar atras el decuors digl atun 2013 l'elecziun dalla cumissiun da gestiun per che quella sappi entrar en uffeci igl 1. da schaner 2014.

President dil cussegl da vischnaunca

Il cussegl da vischnaunca ei obligaus d'entrar e tractar quella fatschenta, aschia che la discussiun davart la debatta d'entrada croda.

Discussiun da detagl

Tractaziun dalla lescha davart ils dretgs politics

Art. 38 Entrada en vigur

Cussegl da vischnaunca

Pertgei entran las midadas dalla lescha davart ils dretgs politics buca gia igl 1. d'uost 2013 en vigur? La lescha duess gie esser en vigur quest atun cura che l'elecziun dalla cumissiun da gestiun succeda.

Suprastonza communal

Las novas incaricas dalla cumissiun da gestiun valan pér naven digl 1. da schaner 2014. Denton lavura la cumissiun da gestiun en uffeci entochen ils 31 da december 2013 tenor las prescripziuns dalla lescha vertenta. Medemamein valan las midadas dalla constituziun communal, decididas ils 3 da mars 2013 entras il pievel ed approbadas ils 21 da matg 2013 entras la Regenza, pér naven digl 1. da schaner 2014. Sco gia tier la revisiun totala dalla constituziun communal avon 5 onns han las elecziuns giu liug igl atun 2008 sin fundament dalla constituziun revedida ch'ei passada pér igl 1. da schaner 2009 en vigur.

La revisiun dalla lescha davart ils dretgs politics vegn tenor art. 36, lit. c dalla constituziun communal suttamessa al referendum facultativ.

Decisiun

Cun 15 encunter 0 vuschs approbescha il cussegl da vischnaunca la revisiun parziala dalla lescha davart ils dretgs politics cun suttametter la lescha al referendum facultativ conform agl art. 36, lit. c dalla constituziun communal.

Tractaziun dil regulativ da fatschentas

President dil cussegl da vischnaunca

Il cussegl da vischnaunca tracta igl emprem ils artechels ch'ei vegni midai.

Art. 44, al. 2 Ura da damondas

Cusseglia Adrian Pally

Propona ch'era las damondas ch'ei buca vegnidas tschentadas a scret vegnan protocoladas. El ei dall'opiniun che quei caschuni buca gronda lavur supplementara.

Suprastonza communal

Tenor il regulativ vertent eis ei buca pusseivel da tschentar a caschun dall'ura da damondas, damondas a bucca. En quei senn vegn la formulaziun nova encunter als basegns dil cussegl e possibilitescha a quel dad era tschentar damondas da meins gronda impurtonza a bucca. Ei fa denton buca basegns che quellas damondas vegnan nudadas el protocol. La suprastonza communal propona sulettamein d'augmentar il termin per tschentar damondas a scret da 2 sin 3 dis. Aschia ha la suprastonza communal pli bia temps per las retschercas necessarias.

Art. 44, al. 4 Ura da damondas

Cusseglia Marco Schmed

Propona d'adattar l'alinea 4, en quei senn ch'ina discussiun sa haver liug.

Suprastonza communal

L'ura da damondas ei ina tractanda sut la quala ils commembers dil cussegl da vischnaunca san s'informar, resp. nua ch'els san giavischar sclariment davart ina u l'otra damonda. Denton ei quella tractanda buca destinada per debattar davart fatschentas ni sco scomi da meinis. Perquei duei ina discussiun buca haver liug.

Cussegl da vischnaunca

Il cussegl da vischnaunca meina ina discussiun animanda davart omisduas propostas e sustegn las duas propostas. La finala duei il president dil cussegl decider, schebein ina discussiun en connex cun ina damonda duei haver liug ni buca.

Decisiuns

Cun 13 encunter 0 vuschs e 2 abstenziuns sustegn il cussegl da vischnaunca la proposta da cusseglier Adrian Pally:

Art. 44, al. 2 dil regulativ da fatschentas secloma sco suonda;

"Duront quell'ura san commembers dil cussegl da vischnaunca far damondas che pertuccan in sectur special e selaian rispunder a moda sempl. *Talas vegnan protocoladas.*"

Cun 11 encunter 2 vuschs e 2 abstenziuns sustegn il cussegl da vischnaunca la proposta da cusseglier Marco Schmed:

Art. 44, al. 4 dil regulativ da fatschentas secloma sco suonda

"Las damondas vegnan rispundidas oralmein. Igl interpellant ha la pusseivladad da far ina damonda supplementara. *Ina discussiun sa haver liug.*"

Art. 53, al. 2 Obligaziuns dalla cumissiun da gestiun

Cusseglie Edgar Durschei

Propona che alinea 2 vegn formulada aschia, che la cumissiun da gestiun sa prender investa dils protocols suenter che quels ein vegni approvai.

Decisiun

Cun 14 encunter 0 vuschs ed 1 abstenziun approbescha il cussegl da vischnaunca la proposta da cusseglie Edgar Durschei:

Art. 53, al. 2 dil regulativ da fatschentas secloma sco suonda:

“Ella sa prender investa dils protocols dallas autoritads communalas, suenter che quels ein vegni approvai.”

Resalvau resta la formulaziun giuridicamein correcta entras la suprastanza communal.

Art. 57 Determinaziuns finalas

Cusseglie Edgar Durschei

Propona che la revisiun dil regulativ da fatschentas duei passar igl 1. d’uost 2013 en vigur e buca pér igl 1. da schaner 2014.

Suprastanza communal

Cun risguard sin las novas prescripziuns dalla constituziun communal, sco era dalla lescha davart ils dretgs politics che passan per igl 1. da schaner 2014 en vigur, duei era il regulativ da fatschentas passar igl 1. schaner 2014 en vigur. Las midadas previdas el regulativ da fatschentas tegnan quen dalla revisiun parziala dalla constituziun communal e dalla lescha davart ils dretgs politics. La nova formulaziun tenor art. 53, al. 2 savess caschunar conflicts per la cumissiun da gestiun en uffeci. Quella formulaziun po satisfar als basegns d’ina cumissiun da gestiun ch’ei buca involucada ella discussiun politica, denton buca alla situaziun actuala. Ei fuss buca exlaus che la cumissiun da gestiun semischedass en fatgs operativs dalla suprastanza communal.

Il regulativ da fatschentas sa bein entrar en vigur igl 1. d’uost 2013, denton senza la formulaziun digl art. 53 gest approvada entras il cussegl da vischnaunca.

Cussegl da vischnaunca

L’entrada en vigur dil regulativ da fatschentas duess buca star en contradicziun cun la constituziun revedida. Cuzun la formulaziun nova digl art. 53 che vegn apparentamein era praticada en autras vischnauncas. La damonda davart la suprastanza communal, tgei vischnauncas che practicheschan la situaziun actuala concernent la cumissiun da gestiun che disponan d’ina formulaziun tenor art. 53 niev, vegn buca rispundida.

Cusseglie Edgar Durschei

Sa s’accordar ch’igl art. 53 dil regulativ da fatschentas passa pér l’entschatta schaner 2014 en vigur.

Decisiun

Cun 14 encunter 0 vuschs ed 1 abstenziun decida il cussegl da vischnaunca che la revisiun dil regulativ da fatschentas duei entrar igl 1. d’uost 2013 en vigur. La revisiun digl art. 53 dil regulativ da fatschentas denton pér igl 1. da schaner 2014.

President dil cussegl da vischnaunca
Dat la pusseivladad da revegnir.

Art. 24 Cumissiuns predeliberontas

Cusseglia Rita Huonder-Tenner

Propona da cumpletar igl art. 24 entras ina secunda alinea che duei seclamar sco suonda:

“Per la deliberaziun da fatschentas da tempra finanziaria sa il cussegl da vischnaunca eleger ina cumissiun permanenta.”

Quella formulaziun possibilitescha al cussegl da vischnaunca da pretractar fatschentas da muntada finanziaria. Cheutras survegn il cussegl da vischnaunca in instrument da sclarir damondas che san caschunar retardaments en connex cun la tractaziun enteifer il cussegl.

Suprastonza communal

Quella formulaziun cunterfa alla veglia dils iniziants che han giavischau che la cumissiun da gestiun vegni eligida entras il pievel e che la funcziun da controlla dalla cumissiun da gestiun vegni detratschada dallas autoritads politicas. Tgei funcziun duei la cumissiun da gestiun haver el futur, dil mument ch’il cussegl da vischnaunca elegess ina cumissiun da finanzas permanenta? Plinavon sa il cussegl da vischnaunca installar ina cumissiun predeliberonta per mintga fatschenta che vegn suttamessa ad el per tractaziun.

Cussegl da vischnaunca

L’impurtonza dalla cumissiun da gestiun duei buca vegnir sutvaletada. Schegie ch’il cussegl da vischnaunca ha la pusseivladad d’installar ina cumissiun predeliberonta per mintga fatschenta, havess quella cumissiun la pusseivladad da sclarir damondas specificas pil cussegl. Ulteriuramein vesa il cussegl da vischnaunca en quella cumissiun la pusseivladad da sustener la posiziun dalla suprastonza communal enteifer il cussegl da vischnaunca.

Suprastonza communal

Ina cumissiun da finanzas permanenta caschunass conflicts da competenza denter la cumissiun da gestiun e la cumissiun da finanzas. Avon che decider davart la proposta da cussegliera Rita Huonder-Tenner sto la proposta vegnir sclarida giuridicamein. Perquei duei quella proposta vegnir decidida a caschun d’ina proxima seduta dil cussegl da vischnaunca.

Decisiun

Cun 14 encunter 0 vuschs ed 1 abstenziun approbescha il cussegl da vischnaunca la revisiun dil regultaiv da fatschentas. La tractaziun finala digl art. 24 succeda a caschun d’ina proxima seduta dil cussegl da vischnaunca, suenter che la situaziun giuridica ei vegnida sclarida.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



3. Center da sport e cultura: Credit supplementar per sanaziuns urgentas (messadi nr. 3-2013/2016)

President communal

Sin fundament da differentas damondas e discussiuns ch'ein sedadas avon la tractaziun da quella fatschenta ha la suprastanza communal decidu da sistir la tractaziun dalla fatschenta e da cumbinar quella cun ina informaziun e viseta el Center da sport e cultura che duei haver liug a caschun dalla seduta campestra dils 23 d'uost 2013.

Cusseglia Rita Huonder-Tenner, presidenta dalla cumissiun da gestiun

"La cumissiun da gestiun ha priu enconuschientscha, che la suprastanza communal suspendescha sia damonda per in credit supplementar per differentas sanaziuns aunc pendentas e decididas dil pievel a caschun dalla votaziun communal dils 27 da november 2011 ed il preventiv 2013 approbaus dil cussegl da vischnaunca.

Nus sperein che la suprastanza communal resepecti quei conclus e setegni vid la decisiun dil cussegl da vischnaunca dils 12 da november 2012".

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



4. Canalisaziun Sontget – Carcarola – Ual Acletta: Damonda da credit (messadi nr. 4-2013/2016)

Suprastonza communal

Gerau Iso Mazzetta presenta la fatschenta a basa dil messadi nr. 4-2013/2016. Specialmein menziunescha el il fatg, ch'ei setracta d'in project che sto vegnir realisau sin fundament dalla sanaziun dalla Via Cavardiras a Carcarola sco era dalla separaziun dalla auas egl intschess dalla Via Sursilvana e dils quartiers da Sontget, Chischliun, Scaletta e Carcarola. Da menziunar ei era la sanaziun dalla Via Cavardiras entras il Cantun.

In ulteriur project che tanghescha las lingias da provediment e canalisaziun enteifer quei spazi ei il surpassadi a Chischliun che sto sin fundament dallas novas pretensiuns digl uffeci federal pil traffic vegnir sanau. – En quei connex rispunda el gest era ina damonda a scret da cusseglier Christoph Berger. Quei surpassadi duei vegnir remplazzau entras in niev sutpassadi ella prolungaziun dalla Via Chischliun sco colligaziun tier la Via Scaletta. Per saver recaltgar las contribuziuns dil stadi sto la sanaziun dil surpassadi succeder entochen la fin digl onn 2014. Perquei intent ha giu liug ina seduta cun ils responsabels dalla Viafier retica. Sin fundament dil project sa la viafier instradar la procedura pigl acquist da terren. En mintga cass fa ei senn da cumbinar las lavurs vid las lingias da provediment e canalisaziun ensemen cun la realisaziun dil sutpassadi. Cheutras eis ei pusseivel d'optimar ils cuosts per la canalisaziun.

Da menziunar ei ch'il project vegn realisau comunablamein cun ulteriurs possessurs da lingias, sco la Corporaziun d'aua Spina da vin, la Swisscom e la Repower.

Discussiun davart la debatta d'entrada

Cusseglier Chrisitoph Berger

Ei satisfatgs dallas rispostas. El constescha che la separaziun dallas auas ei in'obligaziun che la vischnaunca havess, sin fundament dalla legislaziun federala d'ademplier sin la fin digl onn 2007. El sustegn il project sco era ina sperta realisaziun dil sutpassadi dalla viafier a Chischliun.

Discussiun en detagl

Cunquei ch'ei vegn fatg negina ulteriura discussiun sut la debatta d'entrada ei il cussegl da vischnaunca entaus ella fatschenta.

Cussegl da vischnaunca

La fatschenta ei buca dispiteivla, denton setschantan suandontas damondas: La damonda da credit per la canalisaziun cuntegn la summa da frs. 296'000.--. Ein ils detagls davart las cumparts dils ulteriurs possessurs da lingias enconuschents? Con probabel ei la damonda davart in credit supplementar? Ei la clav da repartiziun dils cuosts denter ils possessurs dallas lingias enconuschenta? Eis ei pusseivel da cumbinar il project da canalisaziun en etappas, tonpli ch'il sutpassadi dalla viafier vegn probablamein realisau pér igl onn 2014?

Suprastonza communal

La summa da frs. 296'000.-- duess esser calculada aschia, ch'in credit supplementar ei buca necessaris. En quella summa ein cunteni sulettamein ils cuosts per la canalisaziun. Ils ulteriurs cuosts ein calculai separadamein per mintga possessur da lingias. Ei dat buca ina clav specifica davart igl entir project. Ils cuosts vegnan reparti tenor la cumpart dil sfoss, il caliber e la profunditad dallas lingias. Ei dat tschancuns nua che la canalisaziun vegn construida persula e lu puspei tschancuns nua ch'in u plirs dils partenaris da lingias sesanflan el medem sfoss. Quella clav vala era leu nua che cuvridas da vias ein tangadas. Il project sa vegnir realisau en etappas. Aschia eis ei pusseivel da realisar il tschancun sut il trassé dalla Viafier retica comunablamein cul sutpassadi.

Decisiun

Cun 15 encunter 0 vuschs decida il cussegl da vischnaunca:

- 1. da conceder per la canalisaziun Sontget – Carcarola – Ual d'Acletta in credit brut da frs. 296'000;*
- 2. da suttametter quei conclus el senn d'art. 21, lit. c dalla costituziun communal al referendum facultativ.*

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



5. Ura da damondas (conform ad art. 44 dil regulativ da fatschentas)

Cussegliaer Christoph Berger/sutpassadi viafier a Chischliun
"Cul messadi „Canalisaziun Sontget-Carcarola-Ual d'Acletta: Damonda da credit" han tut ils cussegliers survegniu in plan dalla situaziun.

Jeu sun sco cusseglier surstaus, ch' il „Projekt Neubau Unterführung RhB" il niev sutpassadi che remplazza igl existent surpassadi ei aunc buca vegnius presentaus e che quella damonda da credit vegn aunc buca fatg.

Situaziun:

Il surpassadi existent che colligia la Via dils Larischs cun la Via Scaletta/Via Cavardiras sto vegnir remplazzaus muort la segirtad. Il terren lubescha buca da far in sutpassadi el liug existent. La colligiaziun previda denter Via Chischliun e Via Scaletta ei la pli cuorta colligiaziun e tenor mei la pli perderta.

Finanziaziun:

Sch' il sutpassadi vegn buca ralisaus tochen la fin 2014 survegnin nus buca las subvenziuns dalla Confederaziun, Cantun e Viafier retica tochen 75% dils cuosts. Per in sutpassadi che cuosta ca. in miez milliun francs vein nus aunc da pagar frs. 125'000.--. Ils cuosts da rodund 40'000.- per la traversada dil trassé dalla Viafier retica sco dumandau el messadi curdassen naven, ni detg auter, la realisaziun dil sutpassadi cuosta ca. frs. 85'000.- dapli.

Temas:

Jeu saiel capir che buca tut ils vischins ein cuntents che la senda meina sper lur casa vi. Ei sa denton buca esser, ch' in ni dus vischins savessen impedir ch' ils quartiers da Sontget e Chischliun ston ir el Vitg ni a Disla per saver traversar ils binaris. La colligiaziun dallas sendas da spassegiar sto vegnir mantenida e sto esser accessibla cun ina crotscha d'affons. Vinavon fuss ei prudent, sche la maschina dalla vischnaunca cun ina ladezia dad 1.4 m pudess atras. Ch' ils vischins han tema che tut ils autos vegnan atras per ir pli spert a Raveras etc. saiel jeu capir. Il sutpassadi duei esser construius aschia, che vehichels san mo carrar en cass d'urgenza (impediment cun ina petga fier).

Realisar il pli spert pusseivel!

- Sche la realisaziun entscheiva buca immediat, perdin nus quasi in miez milliun francs subvenziuns!
- Sche vischins ein tuttina encunter, tonscha il temps per far ina expropriaziun.
- Sche la realisaziun schabegia buca immediat, vein nus cuosts supplementars per realisar la canalisaziun.

Jeu spetgel dalla suprastonza che la realisaziun dil sutpassadi Viafier retica vegni accelerada, engraziel !"

Suprastonza communal

La damonda ei vegnida rispundida en connex cun la presentaziun dalla fatschenta sut tractanda 4.

Il president communal informescha davart suandonts fatgs:

La suprastonza communal ha eligi Ludivina Petridis-Riedi sco assistenta dalla direcziun en piazza parziala da 60%. Dunna Petridis entscheiva sia incarica ils 15 da fenadur 2013.

Ils organs da Sedrun Mustér Turissem han decidiu da colaborar el futur cun Grischun vacanzas. Quei possibilitescha ch'il preventiv per la reclama sa vegnir augmentaus per 50% sin rodund frs. 450'000.-- ad onn. Cun quella collaboraziun spetgan ins da saver nezegiar sinergias e da rinforzar la destinaziun.

Igl actual biro da SMT el vitg vegn sligiau. Il survetsch d'informaziun e da reservaziun, sco la tgira dalla clientella succedan en fuorma d'in contract da prestaziun alla Staziun dalla Viafier retica, resp. entras las Pendicularas Mustér e parzialmein entras il Center da sport e cultura.

Cussegl da vischnaunca

En connex cun ina damonda pertuccont il postulat da cusseglier Clemens Berther ei aunc ina risposta davart la suprastonza communal pendent. Ei vegn giavischau ch'igl actuar dil cussegl meini ina gliesta da pendenzas.

President dil cussegl da vischnaunca

Per la finiziun dalla seduta fa el attents ad entginas occurrenz che han liug il proxim temps a Mustér ed envida ils presents da separticipar stediamein.

La proxima seduta dil cussegl da vischnaunca ha liug venderdis, ils 23 d'uost 2013. Igl ei previu da prender allas 16⁰⁰ uras investa dil menaschi dil Center da sport e cultura. Silsuenter ha liug ca. allas 18⁰⁰ uras ina seduta en Sala Fontauna. Il program detagliau suonda.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen

Disentis/Mustér, ils 22 da zercladur 2013

G:\Uffeci baghegiar\Cussegl da vischnaunca\Cussegl da vischnaunca 2013_16\Protocols\Cus0016_04.docx